

Moderno ta Mihó?

Leinan nobo pa ku divorsio ta na kaminda! Maske nos gobernantenan no a tuma desishon ainda, manera kos ta pinta, nos leinan aktual pronto por wòrdu konsiderá antikuá.

Aktualmente lei ta pèrmití divorsio solamente ora tur dos banda ta di akuerdo: si un ta pidi divorsio, i e otro ta dun'é. Ademas por divorsíá pa un di e siguiente kuater motibu so: adulterio, abandono, maltrato, òf kai será pa mas ku kuater aña.

En kontraste, e lei moderno lo pèrmití divorsio pa kualke chinchán kos. Lo no ta nesesario pa proba ku tin fayó. I kualke persona por divorsíá, asta si su kasá ta nenga redondamente!

Nos ta protestá rigurosamente kontra e lei moderno proponé! Sin duda, divorsio lo eskalá ku e lei aki, kousando muchu mas doló i kurasonnan kibrá den nos komunidat. **Un di esnan ku lo pena mas tantu ta e yunan inosente.**

Ta bon konosí ku desaroyo emoshonal di muchanan ta ligá dirèkt ku e presensia kontinuo i caloroso di parti di **tur dos** mayor. Kualke kos ku ta interferí ku e relashon vital ei ku sea mama òf tata por tin konsekuensianan duradero pa e yu.

Un estudio a revelá ku 90% di muchanan di famianan divorsíá a sufri shòk pisá, ferdrit intenso, i miedu irashonal ora e separashon a tuma lugá. Mitar di e muchanan a sinti rechasá i bandoná. (I ta un echu ku tres aña despues di e divorsio, mitar di e tatanan nunca a bishitá nan yunan.) Ademas, hopi mucha ta sinti kulpabel...ku ta nan falta ku e divorsio a tuma lugá.

Un terser parti di e yunan tabatin miedu ku e mayor ku a keda tambe lo bandoná nan, i 66% a eksperensíá deseonan (ku sientífikonan a deskribí komo) “intenso” pa e mayor ousente. I 5 aña despues di e divorsio, 37% di e muchanan tabata mas infelís i mas desatesfasé ku nan tabata 1½ aña despues di e divorsio. **Tempu no a kura nan herídanan.**

Un sikólogo a studia e afektonan di divorsio riba muchanan i a skirbi un buki. El a haña ku beibinan bou di dos aña ta ekspresá nan emoshonnan ku falta di apetít òf hopi yoramentu. Muchanan entre 3 pa 5 aña tin masha miedu ku nan lo wòrdu bandoná. Asta separashon pa un ratu di e mayor por ta algu troumátiko. E mucha por preferá hunga ku huguete ku el a lubidá basta tempu kaba òf tin problema pa siña bai tualèt.

Por nota tristesa pasivo den muchanan entre 6 pa 8 aña. Nan no tin e abilidadat mental pa distansiá nan mes for di e situashon manera muchanan mas grandi. Un mucha di 7 aña a bisa ku maske e ta hopi tristu, e no por yora pasobra e lo yora tur ora.

Muchanan entre 9 pa 12 aña por ekspresá rabia pisá. Esaki ta aliviá temporalmente nan sintimentu di ta indefenso. Tambe nan ta eksperensíá problema ku nan propio identidat.

Hopi tineidjer ta rabia ku nan mayornan divorsíá, akusando e mayornan di ta egoísta i sin konsiderashon pa nan. Tin bes nan ta bira seksualmente aktivo, especialmente si e mayornan ta kòrta orea di otro òf ta namorá otro hende. Nan ta sinti ku tur regla moral ku nan a wòrdu siñá no ta na vigor mas. Di otro banda, algun tineidjer ta purba siña for di e frakaso di nan mayornan.

En bista di esaki (i muchu mas faktor ku nos no a mensioná), ta prudente pa hasié mas fásil pa optené un divoriso? Bo ke skohe pa hasi tantu dañó na bo yunan? Maske kon bashí bo relashon matrimonial por ta, lo no ta mihó tòg pa pone propio interes un banda i skohe pa keda huntú?

Esun ku a krea hende tambe a inventá matrimonio. E sa ku divorsio ta desastroso pa hende. Hesus a enfatisá, “..loke Dios a uni, no laga ningun hende separá” (Mateo 19:6). I nos Kreador ta kategórikó, “*Mi ta odia divorsio*” (Malakias 2:16).

Hende nunca por mehorá e plan di Dios. Su leinan ta mes válido awe ku ora El a krea matrimonio. Pa loke ta regardá e leinan pendiente di divorsio, moderno no ta mihó!